

Գ. Խ. Սահակյան

ՆԿԱՐԻՉ ՄԱՆԱՍՆԵՐԸ

(Նյութեր հայ կերպարվեստի պատմության)

Սովետական Հայաստանում, հատկապես արվեստի ինստիտուտում խոշոր աշխատանք է կատարվում հայ մշակույթի պատմության հետազոտման ուղղությամբ: Արդեն լույս են տեսել մեծ ու փոքր մի շարք աշխատություններ հայ հարտարապետության, թատրոնի, երաժշտության ու նկարչության վերաբերյալ: Նյութի այդպիսի կուտակումից հետո միայն հնարավոր պիտի լինի անցնել հայ արվեստի տարբեր ճյուղերի պատմության սխեմատիկ ու ամբողջական շարադրանքին:

Հետազոտման այս շրջանում օգտակար կարող են լինել այն բոլոր տվյալները, որոնք վերաբերվում են անցյալին և քիչ ծանոթ են մեր բանասերներին:

Ներկա հաղորդմամբ մեր նպատակն է համառոտ տեղեկություններ տալ Թուրքիայում գործող հայ նկարիչների մի գերդաստանի մասին, որը մոտ երկու հարյուր տարի կապված լինելով սուլթանների հետ, ունեցել է նկատելի գործունեություն:

Դա Մանասների գերդաստանն է: Ինչպես Պալյան գերդաստանի ներկայացուցիչները երկար տասնամյակներ եղել են արքունի ճարտարապետներ, Տատյանները՝ վառողապետներ, Տյուղյանները՝ ոսկերիչներ, Մանասներն էլ եղել են սուլթանների պաշտոնական նկարիչները՝ 17—19-րդ դարերում:

Մանասների վերաբերյալ ունենք տալիս բավականաչափ առատ նյութ: Ընդ որում այդ մասին առաջինը գրել է հայտնի արվեստաբան Արմենակ Սազրգյանը, օգտագործելով վավերական մի շարք աղբյուրներ, նաև իր լսած ու դիտած փաստերը: Ազգային հիվանդանոցի «Ընդարձակ տարեցույցի» 1932 թ. տարեգրքում նա տպագրել է «ԺԹ դարու սուլթաններու հայ մանրանկարիչները և թուրք իշխանուհիի մը մանրանկարը» հոդվածը¹, որտեղ առաջին անգամ խոսում է Մանաս նկարիչների մասին, տալիս որոշ տեղեկություններ: Նույն տարեցույցի 1933 թ. գրքում նա տպագրել է «Մանասները—հայ նկարիչներու հարստություն մը ԺԸ—ԺԹ դար» հոդվածը²: Սազրգյանը Մանասների մասին խոսում է նաև 1933 թ. Ա. Չոպանյանի «Անահիտում» տպագրած «Հայերու գեղարվեստական գործունեությունը Իկոնիո և Կ. Պոլսո սուլթաններու օրոք» հոդվածում³: Վերջապես՝ նա վերոհիշյալ հոդվածների պարունակած փաստերը սեղմ և կուտ մի շարադրանքով զետեղել է «Pages d'Art Armenien»⁴ ֆրանսերեն արժեքավոր աշխատության մեջ, դրան հատկացնելով ուռանձին մի գլուխ՝ «Մանասները՝ նկարիչների և մանրանկարիչների մի դի-

¹ «Տարեցույց ս. փ. Ազգ. հիվանդանոցի», 1932, էջ 144—148:

² «Տարեցույց ս. փ. Ազգ. հիվանդանոցի», 1933, էջ 52—57:

³ «Անահիտ», 1933, հուլիս—սեպտեմբեր, էջ 30—31:

⁴ Armenag Sakizian, Pages d'Art Armenien, p. p. 97—101.

նաստիա սուլթանների մոտ 18—19-րդ դարերում» վերնագրով: Սազըզյանը հրատարակել է Մանասներից մեկի՝ Ռուբենի մի գործը՝ Ֆաթմա Սուլթանի դիմանկարը:

Մանաս նկարիչների մասին խոսում է նաև նկարիչ Օննիկ Ավետիսյանը իր «Հայ նկարիչներ և քանդակագործներ» ֆրանսերեն օգտակար աշխատության մեջ, հիմնականում Ա. Սազըզյանի փաստերը նկատի ունենալով⁵:

Այս գերդաստանի վերաբերյալ հետաքրքիր տեղեկություններ ենք գտնում թուրքական աղբյուրներում, մանավանդ Յա. Չարքի «Հայերը թուրքական պետական ծառայության մեջ» գրքում⁶: Այնտեղ կան շատ կարևոր փաստեր, որոնք անծանոթ են Սազըզյանին: Բացի այդ՝ Չարքը հրատարակել է Մանասներից մի քանիսի լուսանկարները:

Այս բոլորի վրա եթե ավելացնենք այն, որ Ա. Սազըզյանը օգտագործել է ոչ միայն իր լսած բանավոր տվյալները, տեսած նկարները. այլև գրավոր երկու շատ արժեքավոր աղբյուր՝ իտալացի հոգևորական գործիչ Ջ. Բողորինիի և ծագումով հայ հայտնի պատմաբան Մուրադջա ԴՕհստնի վկայությունները վերոհիշյալ նկարիչների մասին, իսկ Չարքը օգտագործել է արխիվային վավերագրեր, ապա կունենանք բավականաչափ հարուստ նյութ վերոհիշյալ նկարիչների մասին:

Այս գերդաստանը հայ արվեստի պատմությամբ զբաղվողներին հետաքրքրելու է ոչ միայն նրանով, որ սկսած 17-րդ դարի սկզբներից մինչև 19-րդ դարի կեսերը սուլթանների նկարիչները եղել են հայեր, սրանց վրձինն է պատական պատմությունը մի քանի սուլթանների կենդանագրերով, այլև այն պատճառով, որ այդ նկարիչների գործունեությունը չի պարփակվել պալատական պարիսպների մեջ: Մեծ մասամբ իրենց կրթությունը ստանալով նվիրալուծ և որպես դիվանագետներ ծառայելով Փարիզի, Վիեննայի, Վենետիկի թուրքական դեսպանատներում, նրանք շփվել են աշխարհիկ կյանքի հետ, ներշնչման աղբյուր ունեցել իրական կերպարներ, Կապված են եղել նաև հայ իրականության հետ, հայ եկեղեցիների, մատուռների, կրոնական հաստատությունների համար ստեղծել են սրբանկարներ, և վերջապես պատրաստել են հայ հարուստների յուզաներկ դիմանկարները:

Մանաս գերդաստանի որտեղից գալու վերաբերյալ ստույգ տեղեկություններ չունենք. մի վկայության համաձայն նրանց նախահայրը համարվող Արթին Մանասը 16-րդ դարում Կեսարիայից Կ. Պոլիս է եկել և այնտեղ հաստատվել⁷:

Չարքը ասում է, թե թուրքական աղբյուրներում այդ գերդաստանի անվան տարբեր ձևերով՝ Մանաս, Մինաս, Մենաս գրվելն արդյունք է, հին թուրքերենի՝ այսինքն արաբերեն տառերի ձայնավոր չգործածելուն: Կարելի էր գուցե կասկածել, որ այդ անունը առաջացել է Մինաս բառից, եթե նկարիչներից մեկը շատրագրեր Manasse, որ հայերի կողմից օգտագործված եբրայական անուն է և գալիս է Աստվածաշնչից:

⁵ Onnig Avedissian, Peintres et sculpteurs Arméniens. Le Caire, 1959. pp. 121. 398.

⁶ Y. Çark, Türk devletli hizmetinde ermeniler, İstanbul, 1953, s. 135—145.

⁷ Նույն տեղում, էջ 135:

Մանասների գերդաստանի գործունեությունը պայմանականորեն կարելի է բաժանել երկու շրջանի՝ 1600-ական թվականների սկզբներից մինչև 19-րդ դարի քսանական թվականները և՛ այդ թվականներից մինչև դարավերջը:

Առաջին շրջանի մասին խոսում են Արքա Թողերինին և ԴՕՀսոնը:

Զ. Թողերինին, որը 1781—1786 թվականներին հինգ տարի գործել է Պոլսում, ուսումնասիրել թուրքական գրականությունն ու արվեստը, վերադառնալով Վենետիկ՝ 1787 թ. հրատարակում է «Թուրքական գրականությունը» աշխատությունը, որտեղ խոսում է նաև սուլթանների պալատական նկարիչների մասին: Հենց այդտեղ է, որ նա ասում է, թե սկզբներում, սուլթանների պալատական նկարիչները եղել են պարսիկ մանրանկարիչները, որոնք աշխատել են փղոսկրի վրա, թե հետագայում այդ գործը իրենց ձեռքը վերցրին հայերը, և՛ հետևելով եվրոպական ոճին, սկսեցին պատրաստել նաև յուղաներկ կտավներ:

Ահա թե ինչ է գրել նա ըստ Ա. Սադրզյանի. «Հայազգի Բարսեղը (Barsic) նկարեց սուլթան Ահմետը (1703—1730), հայազգի Ռաֆայելը՝ Մահմուդ, Օսման և Մուստաֆա (1730—1754, 1754—1757, 1757—1773) երեք կայսերուն կենդանագիրները: Վերջապես Մենասե, որդի Ռաֆայելի, շինեց իշխող սուլթան Աբդուլ Համիդի (1773—1789) բնական մեծությամբ քանի մը կենդանագիրները»⁸:

Թողերինին անձամբ ծանոթ է եղել նկարիչ Ռաֆայելին, այցելել է Պոլսի քեներ թաղամասում գտնվող նրա աշխատանոցը, տեսել մի քանի նկարներ:

Ռաֆայել Մանասի մասին ուշագրավ տեղեկություններ է հաղորդել Մուրադա ԴՕՀսոնը 1790 թվականին Փարիզում հրատարակած Tableau General de l'Empire Ottoman գրքում: Հստակ նրա՝ Ռաֆայել Մանասը եղել է Բարսեղի որդին, հաջորդել է այդ պաշտոնում իր հորը և մասնագիտական կրթությունն էլ ստացել է Խալիֆայում: ԴՕՀսոնը վկայում է, որ «հայազգի այս նկարիչը այնքան հուշակավոր է եղել, որ համեմատվել է վերածննդի շրջանի մեծ նկարիչ Ռաֆայելի հետ՝ իր դարուն Ռաֆայելը կը նկատվեր»:

Իհարկե այս չափազանցություն է, հենց նույն պատմիչը, խոսելով Մանասների արվեստի մասին, ասում է, թե այն հեռու էր իտալական և ֆլամանդական արվեստից, և դա բացատրում է նրանով, որ մահմեդական Թուրքիայում նկարիչները հնարավորություն չունեին օգտագործելու իրենց արվեստը, հարկադրված էին զբաղվել սրբեր նկարելով, քանի որ նկարվելու և նկար պահելու սովորությունը հազվադեպ էր այդ երկրում, սակայն, այս բոլորով հանդերձ ԴՕՀսոնի, Թողերինիի, թուրքական արվեստների թանգարանի դիրեկտոր Խալիլ էթհեմի և արվեստագետ Արմենակ Սադրզյանի վկայությամբ, — որոնք բոլորն էլ տեսել են նրանց նկարներից նմուշներ, — Մանասները եղել են կարող արվեստագետներ:

Սրանք են Մանասների գերդաստանի այն սերնդին վերաբերող փաստերը, որոնց գործունեությունը հասնում է մինչև 18-րդ դարի վերջերը:

Որոշակի տվյալներ չունենք Աբդուլ Համիդ Ա-ին հաջորդող Սուլթան Սելիմ Գ-ի և սուլթան Մուստաֆա Գ-ի ժամանակաշրջանի պալատական նկարիչների մասին: Ա. Սադրզյանը հիշատակում է Զենոբ Մանասին, որն ունեցել

⁸ «Տարեցույց ս. փ. Ազգ. հիմնադրոցի», 1933, էջ 55:

է շորս որդի, շորսն էլ նկարիչ՝ Ռուբեն, Սեպուհ, Գասպար և Աղեքսանդր⁹։ Եթե ճիշտ ընդունենք այս վկայությունը, ապա կարող է ստացվել, որ սուլթան Սելիմի և Մուստաֆայի օրոք աշխատել է Զենոբը, քանի որ նրա որդիներից Սեպուհը արդեն գործում էր հաջորդ սուլթանի՝ Մահմուդ Բ-ի ժամանակ։ Սակայն Չարքը Զենոբին հիշում է որպես 1850—60-ական թվականների նկարիչ։ Կամ սխալ պետք է համարել Սազըղյանի տվյալները, կամ պետք է ընդունել երկու Զենոբ, որոնցից մեկը ապրել է 18-րդ դարի վերջին տասնամյակներում, մյուսը՝ 19-րդ դարի 50—60-ական թվականներին։ Սազըղյանի այն հավաստիացումը, թե Զենոբը եղել է Վիեննայի օսմանյան դեսպանատան առաջին քարտուղար, ավելի կարող է վերաբերվել 1850-ական թվականներին ապրող Զենոբին, քան Սելիմի օրերին, երբ դեռ հայերը դիվանագիտական նման պաշտոններ չէին վարում։

Փաստերն ավելի վավերական են Մանասների այն սերնդի մասին, որը գործել է 19-րդ դարի առաջին կեսին սուլթան Մահմուդի, սուլթան Մեջիդի, սուլթան Ազիզի գահակալության տարիներին։

Սուլթան Մահմուդը (1808—1839), որը վերացրեց ենիչերիությունը և որոշ բեֆումներ հռչակեց, մասնակի հարաբերություն սկսելով Եվրոպայի հետ, որպես պալատական նկարիչ պահում էր Սեպուհ և Մաքսուտ Մանասներին, որոնց նա ուղարկել էր Իտալիա՝ մասնագիտական կրթություն ստանալու։ Մահմուդը արհամարհելով կրոնական նախապաշարումները, որոնց համաձայն նկարվելը համարվում էր սրբապղծություն, հրապարակ է հանում մի շքանշան զարդարված իր նկարով, որ կոչվում էր «Խասմիլի Հյումայուն» (կայսերական նկար)¹⁰։ Այդ շքանշանից, որը պատրաստել էր Սեպուհ Մանասը (1816—1889), շնորհվում են բարձրաստիճան մի շարք գործիչների, այդ թվում Հարուն ամիրա Պեղճյանին։

Սեպուհ Մանասը 30 տարի եղել է Փարիզի թուրքական դեսպանատան առաջին քարտուղարը։ Նա 1858 թ. սուլթանի նկարը Շվեդ-Նորվեգիայի կայսրուհուն տանելու պատվին է արժանացել և այդ պետությունից ստացել է չատուկ շքանշան։ Արխիվային մի փաստաթղթից, ուր մեջ է բերում Չարքը, պարզվում է, որ 1859 թ. Ֆուատ փաշան Փարիզ՝ թուրքական դեսպանատան գործոն անդամներից Հակոբ Կրճիկյանին ուղղած մի նամակով առաջարկում է Սեպուհ Մանասին՝ նույն պաշտոնում, նույն ռոճիկով մնալու պայմանով տեղափոխվել Պոլիս¹¹։

Յա. Չարքը բերում է մի հետաքրքիր փաստ էլ։ Նա գրում է, թե 1836 թ. անգլիացի մի զբոսաշրջիկ, օրիորդ Պարզոենին, զինվորական դպրոցն այցելելիս, այնտեղ սուլթանին վերաբերող մի ցուցասրահում տեսել է սուլթանի մի յուղաներկ նկարը, կատարված թանձր գույներով, հայ նկարիչ Մանասի կողմից¹²։

Սեպուհից Պոլսի հնությունների թանգարանում կա Արդուկ Մեջիդի և Արդուկ Ազիզի մանրանկարները, մեկը ստորագրված Մանաս, մյուսը՝ Սեպուհ Մանաս։ Ըստ երևույթին նա Փարիզում թուրքական դեսպանատանն աշխատե-

⁹ Armenag Sakizian, Pages d'Art Armenien, էջ 99։

¹⁰ Նույն տեղում, էջ 99։

¹¹ Çark, էջ 140։

¹² Նույն տեղում, էջ 137։

իս է պատրաստել սուլթանների նկարների կրկնօրինակները: 1854 թ. վերջերին Պոլսի Փարիզ, Սեպուհ Մանասին ուղղված մի հեռագիր գոհունակությամբ հայտնելով Աբգու Մեջիդի մանրանկարի համար՝ նկարչին պարգևում է մի շքանշան և նույն նկարից հինգ օրինակի պատվեր է տալիս, յուրաքանչյուրի համար որպես նվեր խոստանալով 1500 ղրուշ:

Ա. Սազրզյանը և Յա. Չարքը խոսում են նաև մի քանի այլ Մանասների մասին, որոնք ունեցել են գիվանագիտական գործունեություն և միաժամանակ լբաղվել են նկարչությամբ: Դրանք են Ռուբեն, Գասպար, Ալեքսանդր, Ժոզեֆ Մանասները:

Սրանց մեջ ամենից նշանավորը Ռուբեն Մանասեն է, որը 1869 թ. եղել է Թուրքիայի ընդհանուր հյուպատոսը Միլանում: Իր նկարները ստորագրել է Rubens:

Չարքը՝ նշելով, որ սուլթան Մեջիդի օրով կրոնական մոլեռանդության հետևանքով միառժամանակ դադարեց սուլթանների նկարները զանազան տեղեր ուղարկելու սովորությունը, բայց շարունակվեց ուղարկվել թուրքական դեսպանատներին, ասում է, թե «այս նկարների մի մասը Փարիզում թուրքական դեսպանատան քարտուղար Ռուբենն էր պատրաստում»: Նա է պատրաստել ոչ միայն Փարիզի, այլև Բեռլինի և Վիեննայի թուրքական դեսպանատների համար «Թասֆիրի հումայունի» մեկական օրինակ՝ յուրաքանչյուրի համար ստանալով հինգ հազար ֆրանկ:

Մյուս Մանասների վերաբերյալ ավելի քիչ փաստեր են հասել մեզ:

Սրանցից Ալեքսանդր (Ալեքո) Մանասը 1839 թ. ավարտել է Վիեննայի նկարչական ակադեմիան:

Ա. Սազրզյանը այս գերդաստանի վերջին շառավիղն է համարում Ժոզեֆ Մանասին, որը եղել է Ռուբենի և Սեպուհի հորեղբորորդին: Սա թողել է ավելի մեծ թվով գործեր, այդ թվում Գերմանիայի Սգուստա Վիկտորիայի մեկ մանրանկարը: Նա պատրաստել է նաև Դեյի Ֆուլատ փաշայի յուղաներկ պորտրեն:

Մենք ծանոթացրինք սերնդե սերունդ գործող մոտ տասը Մանասների: Արքունի այդ նկարիչները ունեցել են բեղուն գործունեություն և երկու հարյուր տարվա ընթացքում պետք է որ ստեղծեին մի քանի տասնյակ կտավներ, էլ չենք խոսում մանրանկարչական արվեստի մասին:

Արդ՝ ի՞նչ է հասել մեզ այդ բոլորից: Կ. Պոլսի արվեստների թանգարանի դիրեկտոր Խալիլ էթհեմը, որ 1924 թ. հրատարակել է մի աշխատություն թանգարանի հարստությունների մասին, վկայում է, որ իրենց մոտ պահպանվում են Մանասների ստեղծագործություններից մի քանիսը, ստորագրված արաբերեն Մանաս:

Մեր հիշատակած Թոդերինին Ռաֆայել Մանասի արվեստանոցում տեսել է մի փոքրիկ Վենյուս «լավ գծագրված և լավ ներկված»: Բացի այդ՝ նա գրում է. «Տեսա ևս պալատական աղջիկ մը, մեծադիր, որ ափսեի մեջ կը կրեր կտրված ձմերուկ մը, գույները և գծագրությունը լավ էին, աղջիկը զարդարված էր գոհարեղեններով, մանյակներով ու ապարանջաններով, եղունգները կարմիր ներկված էին ըստ թուրք կանանց սովորության»¹⁴:

Մանասների վրձնին պատկանող մի քանի նկարներ էլ տեսել է Արմենակ Սազրզյանը:

¹⁴ «Տարեցույց Ազգ. հիվանդանոցի», 1933, էջ 54.

«Ես ալ բախտը ունեցա տեսնելու, — գրում է նա, — Թոփ Գափուի թանգարանին հավաքածուներեն մեկուն մեջ թիվ 37070 գեղագիր արձանագրությանը մը Ռաֆայելին վերագրված շորս նկարներ»¹⁵։

Ռաֆայել Մանասի այդ շորս նկարները մեզ համար ավելի մեծ արժեք են ներկայացնում, քանի որ նրանք պալատի կենցաղից դուրս՝ իրական կյանքն են արտահայտում։ Նկարներից մեկը ներկայացնում է մի երիտասարդի՝ հագին շալվար, ձեռքին վարդի ջրի աման։

Նկարներից երկուսը կանացի կերպարներ են՝ էնթերի հագած։ «Ասոնցմե մին նոնագույն էնթարիով և կանաչ գոտիով է, կուրծքը բոլորովին բաց, միայն մասամբ ծածկված բեհեզյա թավանցիկ շապիկով մը, մյուսը կապույտ հագուստով, մեկ ձեռքը բռնած է աղեղ մը և կոնակին վրա կը կրե կապարճ մը ոտնետեր։ Ռաֆայել, որուն ինչպես որ տեսանք անծանոթ շերին դիցաբանական նյութերը, կերևի ներկայացուցած է Արտեմիսը արևելյան զգեստով»¹⁶։

Ինչպես նախորդ էջերում ասացինք, Ռաֆայելը իր ուսումը ստացել էր Իտալիայում, ծառաել էր Եվրոպայում, շփվել աշխարհիկ կյանքին։ Հասկանալի է, որ նրա վրձինը չէր կարող կաշկանդվել միայն պալատով ու պալատականներով և դժվար թե նա նման մի քանի նկարների համար համարվեր «իր գարուն Ռաֆայելը»։

Մանասների ստեղծագործությունների մեջ բացառիկ արժեք ներկայացնող մի գործ է սուլթան Մեջիդի դուստր Ֆաթմա սուլթանուհու դիմանկարը, որը փղոսկրի վրա պատրաստել է Ռուբեն Մանասը։ Այս գործը, որ հրատարակվել է մի շարք աղբյուրներում, այդ թվում Ա. Սազըզյանի ֆրանսերեն և Ջարքի թուրքերեն աշխատությունում¹⁷, ուշագրավ է ոչ միայն որպես արվեստի գործ, այլև որպես պալատական մի աղջկա տարագր ցուցադրող նկար, քանի որ բացառիկ երևույթ էր մի թրքուհու նկարի պատրաստումը այդ թվերին։ Ռուբենը այն փորագրել է 1850 թ., երբ աղջիկը տասը տարեկան էր։ Ունի ուշագրավ արդուզարդ և տարազ։

Նկարիչների այս գերդաստանի գործունեությունը անշուշտ սղերս ունի հայ կյանքի հետ։ Դեռևս Թողորինին վկայում է, որ նրանք հիմնականում պատրաստում էին սրբապատկերներ, եկեղեցիների և մատուռների համար։ Հասկանալի է, որ առաջին հերթին նկարներ պիտի պատրաստեին Կ. Պոլսի գուցե և այլ քաղաքների հայկական եկեղեցիների համար։

Բացի այդ՝ նրանք անշուշտ պատրաստել են հայ հարուստ ամիրաների յուզաների դիմանկարները։ Մեզ հասել են 18-րդ դարի վերջերի և 19-րդ դարի առաջին քառորդի մի շարք ամիրաների, նույնիսկ նրանց ընտանիքի անդամների յուզաների նկարները։ Հնարավոր է, որ դրանց գեթ մի մասը պատրաստված լինի Մանասների կողմից։

Մենք թվարկեցինք այն բոլորը, որ մեզ հասել են նկարիչ Մանասներից և Գր. Կեռեօղլուից, Տարակույսից վեր է, որ հետագա ւրոնումները հատկապես Պոլսի թանգարաններում և հարուստ ընտանիքներում կատարված պրպտումները կարող են ի հայտ բերել այս ուշագրավ նկարիչներին պատկանող այլ նկարներ։ Համենայն դեպս սա մի նյութ է, որով զբաղվելու դիտքում մենք կուենանք հա; նկարչության պատմության ուշագրավ էջերից մեկը։

¹⁵ Նույն տեղում։

¹⁶ «Տարեցույց ս. փ. Ազգ. հիվանդանոցի», 1933, էջ 54—55։

¹⁷ A. Sakizian. Pages d'Art Armenien, fig 75, Çark, էջ 138 և այլն։